

অভাগীর স্বৰ্গ

ঐশ্বর্য চন্দ্র চট্টোপাধ্যায়

ঃ প্রাপ্তস্থান :

কামিনী প্রকাশালয়

১১৫, অখিল মিস্ত্রী লেন

কলিকাতা-৭০০০০৯

প্রকাশক :
শ্যামাপদ সরকার
১১৫, অখিল মিস্ত্রি লেন,
কলিকাতা-৭০০ ০০৯

প্রথম কামিনী সংস্করণ :
শুভ অক্ষয় তৃতীয়া— ১৩৬৯

প্রচ্ছদ শিল্পী :
পার্থ প্রতিম বিশ্বাস

মুদ্রাকর :
গোপীনাথ চক্রবর্তী
অবলা প্রেস
১/এ, গোয়াবাগান স্ট্রীট
কলিকাতা-৭০০০০৬

অভাগীর স্বর্গ

॥ এক ॥

ঠাকুরদাস মুখুয্যের বয়ীসী স্ত্রী সাতদিনের জ্বরে মারা গেলেন। বৃদ্ধ মুখোপাধ্যায় মহাশয় ধানের কারবারে অতিশয় সঙ্গতিপন্ন। তাঁর চার ছেলে, তিন মেয়ে, ছেলেমেয়েদের ছেলেপুলে হইয়াছে, জামাইরা—প্রতিবেশীর দল, চাকর-বাকর—সে যেন একটা উৎসব বাধিয়া গেল। সমস্ত গ্রামের লোক ধুমধামের শবযাত্রা ভিড় করিয়া দেখিতে আসিল। মেয়েরা কাঁদিতে কাঁদিতে মায়ের দুই পায়ে গাঢ় করিয়া আলতা এবং মাথায় ঘন করিয়া সিন্দূর লেপিয়া দিল, বধূরা ললাট চন্দনে চর্চিত করিয়া বহুমূল্য বস্ত্রে শাশুড়ীর দেহ আচ্ছাদিত করিয়া দিয়া আঁচল দিয়া তাঁহার শেষ পদধূলি মুছাইয়া লইল। পুষ্প, পত্র, গন্ধে, মাল্যে, কলরবে মনে হইল না এ কোন শোকের ব্যাপার—এ যেন বড়বাড়ির গৃহিণী পঞ্চাশ বর্ষ পরে আর একবার নূতন করিয়া তাঁহার স্বামিগৃহে যাত্রা করিতেছেন। বৃদ্ধ মুখোপাধ্যায় শান্তমুখে তাঁহার চিরদিনের সঙ্গিনীকে শেষবিদায় দিয়া অলক্ষ্যে দু'ফোঁটা চোখের জল মুছিয়া শোকাক্ত কণ্ঠ ও বধূগণকে সাঙ্ঘন্য দিতে লাগিলেন। প্রবল হরিক্ষনিতে প্রস্তাভ-আকাশ আলোড়িত করিয়া সমস্ত গ্রাম সঙ্গ সঙ্গ চলিল। আর একটি প্রাণী একটু দূরে থাকিয়া এই দলের সঙ্গী হইল। সে কাঙালীর মা। সে তাহার কুটীর-প্রাঙ্গণের গোটা-কয়েক বেগুন তুলিয়া এই পথে হাতে চলিয়াছিল, এই দৃশ্য দেখিয়া আর নড়িতে পারিল না। রহিল তাহার হাতে যাওয়া, রহিল তাহার আঁচলে বেগুন বাঁধা—সে চোখের জল মুছিতে মুছিতে সকলের পিছনে শ্মশানে আসিয়া উপস্থিত হইল। গ্রামের একান্তে গরুড়-নদীর তীরে শ্মশান। সেখানে পূর্বাহুই বাঠের ভার, চন্দনের

টুকরা, ঘৃত, মধু, ধূপ, ধূনা প্রভৃতি উপকরণ সঞ্চিত হইয়াছিল, কাঙালীর মা ছোটজাত, ছেলের মেয়ে বলিয়া কাছে যাইতে সাহস পাইল না, তফাতে একটা উঁচু টিপির মধ্যে দাড়াইয়া সমস্ত অন্তোষ্টিক্রিয়া প্রথম হইতে শেষ পর্যন্ত উৎসুক আগ্রহে চোখ মেলিয়া দেখিতে লাগিল। প্রশস্ত ও পর্যাপ্ত চিতার পরে যখন শব স্থাপিত করা হইল তখন তাঁহার রাঙ্গা পা-ছুখানি দেখিয়া তাহার ছ'চক্ষু জুড়াইয়া গেল, ইচ্ছা হইল ছুটিয়া গিয়া একবিন্দু আলতা মুছাইয়া লইয়া মাথায় দেয়। বহুকণ্ঠের হরিধ্বনির সহিত পুত্র-হস্তের মন্ত্রপূত অগ্নি যখন সংযোজিত হইল তখন তাহার চোখ দিয়া ঝর-ঝর করিয়া জল পড়িতে লাগিল, মনে মনে বারংবার বলিতে লাগিল, ভাগ্যমানী মা, তুমি সগে যাচ্ছো...আমাকেও আশীর্বাদ করে যাও, আমিও যেন এমনি কাঙালীর হাতের আগুনটুকু পাই। ছেলের হাতের আগুন! সে ত সোজা কথা নয়! স্বামী, পুত্র, কন্যা, নাতি, নাতনী, দাস, দাসী, পরিজন...সমস্ত সংসার উজ্জ্বল রাখিয়া এই যে স্বর্গারোহণ... দেখিয়া তাহার বুক ফুলিয়া ফুলিয়া উঠিতে লাগিল,...এ সৌভাগ্যের সে যেন আর ইয়ত্তা করিতে পারিল না। সত্ত-প্রজ্জ্বলিত চিতার অজস্র ধূঁয়া নীল রঙের ছায়া ফেলিয়া ঘুরিয়া ঘুরিয়া আকাশে উঠিতেছিল, কাঙালীর মা ইহারই মধ্যে ছোট একখানি রথের চেহারা যেন স্পষ্ট দেখিতে পাইল। গায়ে তাহার কত না ছবি আঁকা, চূড়ায় তাহার কত না লতাপাতা জড়ানো। ভিতরে কে যেন বসিয়া আছে...মুখ তাহার চেনা যায় না, কিন্তু সিঁথায় তাঁহার সিঁতুরের রেখা, পদতল-ছটি আলতায় রাঙানো। উর্ধ্বদৃষ্টে চাহিয়া কাঙালীর মায়ের দুই চোখে অশ্রুর ধারা বহিতেছিল, এমন সময়ে একটি বছর চোদ্দ-পনরর ছেলে তাহার আঁচলে টান দিয়া কহিল, হেথায় তুই দাঁড়িয়ে আছিস মা, ভাত রাঁধবি নে?

মা চমকিয়া ফিরিয়া চাহিয়া কহিল, রাঁধবো'খন রে! হঠাৎ উপরে অঙ্গুলি নির্দেশ করিয়া ব্যগ্রস্বরে কহিল, ঢাখ ঢাখ বাবা,...বামুন-মা ওই রথে চড়ে সগে যাচ্ছে!

ছেলে বিষয়ে মুখ তুলিয়া কহিল, কৈ ? ক্ষণকাল নিরীক্ষণ করিয়া শেষে বলিল, তুই ক্ষেপেছিস ? ও ত ধুঁয়া ! রাগ করিয়া কহিল, বেলা ত্রুপুর বাজে, আমার ক্ষিদে পায় না বুঝি ? এবং সঙ্গে সঙ্গে মায়ের চোখে জল লক্ষ্য করিয়া বলিল, বামুনদের গিন্নী মরছে তুই কেন কেঁদে মরিস মা ?

কাঙালীর মার এতক্ষণে হুঁশ হইল । পরের জন্ম শ্মশানে দাঁড়াইয়া এইভাবে অশ্রুপাত করায় সে মনে মনে লজ্জা পাইল, এমন কি, ছেলের অকল্যাণের আশঙ্কায় মুহূর্তে চোখ মুছিয়া ফেলিয়া একটুখানি হাসিবার চেষ্টা করিয়া বলিল, কাঁদব কিসের জন্তে রে ! চোখে ধোঁ লেগেছে বৈ ত নয়!

হাঃ—ধোঁ লেগেছে বৈ ত না ! তুই কাঁদতেছিলি !

মা আর প্রতিবাদ করিল না । ছেলের হাত ধরিয়া ঘাটে নামিয়া নিজেও স্নান করিল, কাঙালীকেও স্নান করাইয়া ঘরে ফিরিল—শ্মশান-সংস্কারের শেষটুকু দেখা আর তার ভাগ্যে ঘটিল না ।

॥ দুই ॥

সন্তানের নামকরণকালে পিতামাতার মৃত্যুতে বিধাতাপুরুষ অন্তরীক্ষে থাকিয়া অধিকাংশ সময়ে শুধু হাস্য করিয়াই ক্ষান্ত হন না, তীব্র প্রতিবাদ করেন । তাই তাহাদের সমস্ত জীবনটা তাহাদের নিজের নামগুলোকেই যেন আমরণ ভ্যাঙচাইয়া চলিতে থাকে । কাঙালীর মার জীবনের ইতিহাস ছোট, কিন্তু সেই ছোট কাঙালজীবনটুকু বিধাতার এই পরিহাসের দায় হইতে অব্যাহতি লাভ করিয়াছিল । তাহাকে জন্ম দিয়া মা মরিয়াছিল, বাপ রাগ করিয়া নাম দিল অভাগী । মা নাই, বাপ নদীতে মাছ ধরিয়া বেড়ায়, তাহার না আছে দিন, না আছে রাত । তবু যে কি করিয়া ক্ষুদ্র অভাগী একদিন কাঙালীর মা হইতে বাঁচিয়া রহিল সে এক বিশ্বয়ের বস্তু । যাহার সহিত বিবাহ হইল তাহার নাম রসিক বাঘ, বাঘের অন্ত বাঘিনী ছিল, ইহাকে লইয়া সে গ্রামান্তরে উঠিয়া গেল,

অভাগী তাহার অভাগ্য ও শিশুপুত্র কাঙালীকে লইয়া গ্রামেই পড়িয়া
রহিল ।

তাহার সেই কাঙালী বড় হইয়া আজ পনরয় পা দিয়াছে । সবেমাত্র
বেতের কাজ শিখিতে আরম্ভ করিয়াছে, অভাগীর আশা হইয়াছে আরও
বছরখানেক তাহার অভাগ্যের সহিত যুঝিতে পারিলে দুঃখ ঘুচিবে । এই
দুঃখ যে কি, যিনি দিয়াছেন তিনি ছাড়া আর কেহই জানে না ।

কাঙালী পুকুর হইতে জাঁচাইয়া আসিয়া দেখিল তাহার পাতের
ভুক্তাবশেষ মা একটা মাটির পাত্রে ঢাকিয়া রাখিতেছে, আশ্চর্য হইয়া
জিজ্ঞাসা করিল, তুই খেলি নে মা ?

বেলা গড়িয়ে গেছে বাবা, এখন আর ক্ষিদে নেই ।

ছেলে বিশ্বাস করিল না বলিল, না, ক্ষিদে নেই বৈ কি ! কৈ
দেখি তোর হাঁড়ি ?

এই ছলনায় বহুদিন কাঙালীর মা কাঙালীকে ফাঁকি দিয়া
আসিয়াছে । সে হাঁড়ি দেখিয়া তবে ছাড়িল । তাহাতে আর একজনের
মত ভাত ছিল । তখন সে প্রসন্নমুখে মায়ের কোলে গিয়া বসিল ।
এই বয়সের ছেলে সচরাচর একরূপ করে না, কিন্তু শিশুকাল হইতে বহু-
কাল যাবৎ সে রুগ্ন ছিল বলিয়া মায়ের ক্রোড় ছাড়িয়া বাহিরের সঙ্গী-
সাথীদের সহিত মিশিবার সুযোগ পায় নাই । এইখানে বসিয়াই
তাহাকে খেলাধুলার সাধ মিটাইতে হইয়াছে । একহাতে গলা জড়াইয়া
মুখের উপর মুখ রাখিয়াই কাঙালী চকিত হইয়া কহিল, মা, তোর গা
যে গরম, কেন তুই অমন রোদে দাঁড়িয়ে মড়া-পোড়ানো দেখতে গেলি ?
কেন আবার নেয়ে এলি ? মড়া-পোড়ানো কি তুই—

মা শশব্যস্তে ছেলের মুখে হাত চাপা দিয়া কহিল, ছি বাবা, মড়া-
পোড়ানো বলতে নেই, পাপ হয় । সতী-লক্ষ্মী মা-ঠাকুরগণ রথে করে
সগেয়ে গেলেন ।

ছেলে সন্দেহ করিয়া কহিল, তোর এক কথা মা ! রথে চড়ে কেউ
নাকি আবার সগেয়ে যায় ।

মা বলিল, আমি যে চোখে দেখলুম কাঙালী, বামুন-মা বখের উপরে
হসে। তেনার রাজা পা-ছুখানি যে সবাই চোখ মেলে দেখলে রে!

সবাই দেখলে!

সবাই দেখলে।

কাঙালী মায়ের বুক ঠেস দিয়া বসিয়া ভাবিতে লাগিল। মাকে
বিশ্বাস করাই তাহার অভ্যাস, বিশ্বাস করিতেই সে শিশুকাল হইতে
শিক্ষা করিয়াছে, সেই মা যখন বলিতেছে সবাই চোখ মেলিয়া এতবড়
ব্যাপার দেখিয়াছে, তখন অবিশ্বাস করিবার আর কিছু নাই। খানিক
পরে আস্তে আস্তে কহিল, তা হলে তুইও ত মা সগো যাবি? বিন্দির
মা সেদিন রাখালের পিসীকে বলতেছিল, ক্যাঙলার মার মত সতী-লক্ষ্মী
আর ছলে পাড়ায় নেই।

কাঙালীর মা চুপ করিয়া রহিল, কাঙালী তেমনি ধীরে ধীরে কহিতে
লাগিল, বাবা যখন তোরে ছেড়ে দিলে, তখন তোরে কত লোকে ত
নিকে করতে সাধাসাধি করলে। কিন্তু তুই বলিলি, না। বলিলি,
কাঙালী বাঁচলে আমার ছুঁখু ঘুচবে, আবার নিকে করতে যাবো কিসের
জন্তে? তা মা, তুই নিকে করলে আমি কোথায় থাকতুম? আমি
হয়ত না খেতে পেয়ে এতদিনে কবে মরে যেতুম।

মা ছেলেকে দুই হাতে বুক চাপিয়া ধরিল। বস্তুতঃ, সেদিন তাহাকে
এ পরামর্শ কম লোকে দেয় নাই, এবং যখন সে কিছুতেই রাজী হইল
না, তখন উৎপাত-টপড্রবও তাহার প্রতি সামান্য হয় নাই, সেই কথা
স্মরণ করিয়া অভাগীর চোখ দিয়া জল পড়িতে লাগিল। ছেলে হাত
দিয়া মুছাইয়া দিয়া বলিল, ক্যাতাটা পেতে দেব মা, শুবি?

মা চুপ করিয়া রহিল। কাঙালী মাতুর পাতিল, কাঁথা পাতিল,
মাচার উপর হইতে ছোট বালিশটি পাড়িয়া দিয়া হাত ধরিয়া তাহাকে
বিছানায় টানিয়া লইয়া যাইতে মা কহিল, কাঙালী, আজ তোর আর
কাজে গিয়ে কাজ নেই।

কাজ কামাই করিবার প্রস্তাব কাঙালীর খুব ভাল লাগিল, কিন্তু

কহিল, জলপানির পয়সা দুটো ত তা হলে দেবে না মা !

না দিক গে,—আয় তোকে রূপকথা বলি ।

আর প্রলুব্ধ করিতে হইল না, কাঙালী তৎক্ষণাৎ মায়ের বুক ঘেঁষিয়া শুইয়া পড়িয়া কহিল, বল তা হলে । রাজপুত্র কোটালপুত্র আর সেই পক্ষীরাজ ঘোড়া—

অভাগী রাজপুত্র, কোটালপুত্র আর পক্ষীরাজ ঘোড়ার কথা দিয়া গল্প আরম্ভ করিল । এ-সকল তাহার পরের কাছে কতদিনের শোনা এবং কতদিনের বলা উপকথা । কিন্তু মুহূর্তকয়েক পরে কোথায় গেল তাহার রাজপুত্র, আর কোথায় গেল তাহার কোটালপুত্র সে এমন উপকথা শুরু করিল যাহা পরের কাছে তাহার শেখা নয়—নিজের সৃষ্টি । জ্বর তাহার যত বাড়িতে লাগিল, উষ্ণ রক্তস্রোত যত দ্রুতবেগে মস্তিষ্কে বহিতে লাগিল, ততই সে যেন নব নব উপকথার ইন্দ্রজাল রচনা করিয়া চলিতে লাগিল । তাহার বিরাম নাই, বিচ্ছেদ নাই—কাঙালীর স্বল্প দেহ বার বার রোমাঞ্চিত হইতে লাগিল । ভয়ে, বিষ্ময়ে, পুলকে সে সজোরে মায়ের গলা জড়াইয়া তাহার বকের মধ্যে যেন মিশিয়া যাইতে চাহিল ।

বাহিরে বেলা শেষ হইল, সূর্য অস্ত গেল, সন্ধ্যার ঘান ছায়া গাঢ়তর হইয়া চরাচর ব্যাপ্ত করিল, কিন্তু ঘরের মধ্যে আজ আর দীপ জ্বলিল না, গৃহস্থের শেষ কর্তব্য সমাধা করিতে কেহ উঠিল না, নিবিড় অন্ধকারে কেবল রুগ্ন মাতার অবাধ গুঞ্জন নিস্তব্ধ পুত্রের কর্ণে সুধাবর্ষণ করিয়া চলিতে লাগিল । সে সেই শ্মশান ও শ্মশানযাত্রার কাহিনী । সেই রথ, সেই রাজা পা-দুটি, সেই তাঁর স্বর্গে যাওয়া ! কেমন করিয়া শোকাক্ত স্বামী শেষ পদধূলি দিয়া কাঁদিয়া বিদায় দিলেন, কি করিয়া হরিধ্বনি দিয়া ছেলেরা মাতাকে বহন করিয়া লইয়া গেল, তার পরে সন্তানের হাতের আগুন । সে আগুন ত আগুন নয় কাঙালী, সে ত হরি ! তার আকাশ জোড়া ধুঁয়ো নয় বাবা, সেই ত সগেয়র রথ । কাঙালীচরণ, বাবা আমার !

কেন মা ?

তোমার হাতের আঙুল যদি পাই বাবা, রামুন-মার মত আমিও সগো যেতে পাবো।

কাঙালী অক্ষুটে শুধু কহিল, যাঃ—বলতে নেই।

মা সে কথা বোধ করি শুনতেও পাইল না, তপ্তনিঃশ্বাস ফেলিয়া বলিতে লাগিল, ছোটজাত বলে তখন কিন্তু কেউ ঘেন্না করতে পারবে না—ছুঃখী বলে কেউ ঠেকিয়ে রাখতে পারবে না। ইস্! ছেলের হাতের আঙুল—রথকে যে আসতেই হবে।

ছেলে মুখের উপর মুখ রাখিয়া ভগ্নকণ্ঠে কহিল, বলিস নে মা, বলিস নে, আমার বড্ড ভয় করে।

মা কহিল, আর দেখ্ কাঙালী, তোমার বাবাকে ধরে আনবি, অমনি যেন পায়ের ধুলো মাথায় দিয়ে আমাকে বিদায় দেয়। অমনি পায়ের আলতা, মাথায় সিঁদুর দিয়ে,—কিন্তু কে বা দেবে ? তুই দিবি, না রে কাঙালী ? তুই আমার ছেলে, তুই আমার মেয়ে, তুই আমার সব ! বলিতে বলিতে সে ছেলেকে একেবারে বুকে চাপিয়া ধরিল।

॥ তিন ॥

অভাগীর জীবন-নাট্যের শেষ অঙ্ক পরিসমাপ্ত হইতে চলিল। বিস্মৃতি বেশী নয়, সামান্যই। বোধ করি ত্রিশটা বৎসর আজও পার হইয়াছে কি হয় নাই, শেষও হইল তেমনি সামান্য ভাবে। গ্রামে কবিরাজ ছিল না, ভিন্ন গ্রামে তাঁহার বাস। কাঙালী গিয়া কাঁদাকাটি করিল, হাতে-পায়ে পড়িল, শেষে ঘটি বাঁধা দিয়া তাঁহাকে একটাকা প্রণামী দিল। তিনি আসিলেন না, গোটা-চারেক বড়ি দিলেন। তাহার কত কি আয়োজন। খল, মধু, আদার সত্ত্ব, তুলসীপাতার রস—কাঙালীর মা ছেলের প্রতি রাগ করিয়া বলিল, কেন তুই আমাকে না বলে ঘটি বাঁধা দিতে গেলি বাবা ? হাত পাতিয়া বড়ি কয়টি গ্রহণ করিয়া মাথায় ঠেকাইয়া উনানে ফেলিয়া

দিয়া কছিল, ভাল হই ত এতেই হব, বাগদী ছেলের ঘরে কেউ কখনো
'ওষুধ খেয়ে বাঁচে না।

দিন দুই-তিন এমনি গেল। প্রতিবেশীরা খবর পাইয়া দেখিতে
আসিল। যে বাহা মুষ্টিযোগ জানিত, হরিণের শিঙ-ঘষা জল, গোট্টে-কড়ি
পুড়াইয়া মধুতে মাড়িয়া চাটাইয়া দেওয়া ইত্যাদি অব্যর্থ ঔষধের সন্ধান
দিয়া যে যাহার কাজে গেল। ছেলেমানুষ কাঙালী ব্যতিবাস্ত হইয়া
উঠিতে, মা তাহাকে কাছে টানিয়া লইয়া কছিল, কোবরেজের বড়িতে
কিছু হল না বাবা, আর ওদের ওষুধে কাজ হবে? আমি এমনি ভাল
হবো।

কাঙালী কাঁদিয়া কছিল, তুই বড়ি ত খেলি নে মা, উন্ননে ফেলে
দিলি। এমনি কি কেউ সারে?

আমি এমনি সেরে যাবো। তার চেয়ে তুই দুটো ভাতে-ভাত ফুটিয়ে
নিয়ে খা দিকি, আমি চেয়ে দেখি।

কাঙালী এই প্রথম অপটু হস্তে ভাত রাখিতে প্রবৃত্ত হইল। না
পারিল ফ্যান ঝাড়িতে, না পারিল ভাল করিয়া ভাত বাড়িতে। উমান
তাহার জলে না...ভিতরে জল পড়িয়া ধুঁয়া হয়; ভাত ঢালিতে চারি-
দিকে ছড়াইয়া পড়ে; মায়ের চোখ চলছিল করিয়া আসিল। নিজে
একবার উঠিবার চেষ্টা করিল, কিন্তু মাথা সোজা করিতে পারিল না,
শয্যায় লুটাইয়া পড়িল। খাওয়া হইয়া গেলে ছেলেকে কাছে লইয়া কি
করিয়া কি করিতে হয় বিধিমনে উপদেশ দিতে গিয়া তাহার ক্ষীণকণ্ঠ
খামিয়া গেল, চোখ দিয়া কেবল অবিরলধারে জল পড়িতে লাগিল।

গ্রামে ঈশ্বর নাপিত নাড়ী দেখিতে জানিত, পরদিন সকালে সে হাত
দেখিয়া তাহারই স্মুখে মুখ গস্তীর করিল, দীর্ঘনিশ্বাস ফেলিল এবং শেষে
মাথা নাড়িয়া উঠিয়া গেল। কাঙালীর মা ইহার অর্থ বুঝিল, কিন্তু তাহার
ভয়ই হইল না। সকলে চলিয়া গেলে সে ছেলেকে কছিল, এইবার
একবার তাকে ডেকে আনতে পারিস বাবা?

কাকে মা?

ওই যে রে...ও-গায়ে যে উঠে গেছে...

কাঙালী বুঝিয়া কহিল, বাবাকে ?

অভাগী চূপ করিয়া রহিল ।

কাঙালী বলিল, সে আসবে কেন মা ?

অভাগীর নিজেরই যথেষ্ট সন্দেহ ছিল, তথাপি আস্তে আস্তে কহিল,
গিয়ে বলবি, মা শুধু একটু তোমার পায়ের ধুলো চায় ।

সে তখনি যাইতে উদ্ধত হইলে সে তাহার হাতটা ধরিয়া ফেলিয়া
বলিল, একটু কাঁদাকাটা করিস বাবা, বলিস মা যাচ্ছে ।

একটু থামিয়া কহিল, ফেরবার পথে অমনি নাপতে-বৌদির কাছ
থেকে একটু আলতা চেয়ে আনিস কাঙালী, আমার নাম করলেই সে
দেবে । আমাকে বড় ভালবাসে ।

ভাল তাহাকে অনেকেই বাসিত । জ্বর হওয়া অবধি মায়ের মুখে
সে এই কয়টা জিনিসের কথা এতবার এতরকম করিয়া শুনিয়াছে যে,
সে সেইখান হইতে কাঁদিতে কাঁদিতে যাত্রা করিল ।

॥ চার ॥

পরদিন রসিক ছুলে সময়মত যখন আসিয়া উপস্থিত হইল তখন
অভাগীর আর বড় জ্ঞান নাই । মুখের পরে মরণের ছায়া পড়িয়াছে,
চোখের দৃষ্টি এ সংসারের কাজ সারিয়া কোথায় কোন্ অজানা দেশে
চলিয়া গেছে । কাঙালী কাঁদিয়া কহিল, মাগো ! বাবা এসেছে—
পায়ের ধুলো নেবে যে !

মা হয়ত বুঝিল, হয়ত বুঝিল না, হয়ত বা তাহার গভীর সঙ্কিত
বাসনা সংস্কারের মত তাহার আচ্ছন্ন চেতনায় ঘা দিল । এই মৃত্যুপথ-
যাত্রী তাহার অবশ বাজুখানি শয্যায় বাহিরে হাত পাতিল ।

রসিক হতবুদ্ধির মত দাঁড়াইয়া রহিল । পৃথিবীতে তাহারও পায়ের
ধুলার প্রয়োজন আছে, ইহাও কেহ নাকি চাহিতে পারে তাহার কল্পনার

অতীত। বিন্দির পিসী দাঁড়াইয়া ছিল, সে কহিল, দাও বাবা, দাও একটু পায়ের ধূলা।

রসিক অগ্রসর হইয়া আসিল। জীবনে যে স্ত্রীকে সে ভালবাসা দেয় নাই, অশন-বসন দেয় নাই, কোন খোঁজখবর করে নাই, মরণকালে তাহাকে সে শুধু একটু পায়ের ধূলা দিতে গিয়া কাঁদিয়া ফেলিল।

রাখালের মা বলিল, এমন সতীলক্ষ্মী বামুন-কায়েতের ঘরে না জন্মে ও আমাদের ছুলের ঘরে জন্মালো কেন! এইবার ওর একটু গতি করে দাও বাবা - ক্যাঙলার হাতের আগুনের লোভে ও যেন প্রাণটা দিলে!

অভাগীর অভাগ্যের দেবতা অগোচরে বসিয়া কি ভাবিলেন জানি না, কিন্তু ছেলেমানুষ কাঙালীর বৃকে গিয়া এ কথা যেন তীরের মত বিঁধিল।

সেদিন দিনের বেলাটা কাটিল, প্রথম রাত্রিটাও কাটিল, কিন্তু প্রভাতের জন্ম কাঙালীর মা আর অপেক্ষা করিতে পারিল না। কি জানি, এত ছোটজাতের জন্মও স্বর্গে রথের ব্যবস্থা আছে কি না, কিংবা অন্ধকারে পায়ে হাঁটিয়াই তাহাদের রওনা হইতে হয়—কিন্তু এটা বুঝা গেল, রাত্রি শেষ না হইতেই এ ছুনিয়া সে ত্যাগ করিয়া গেছে।

কুটীর-প্রাঙ্গণে একটা বেলগাছ, একটা কুড়ুল চাহিয়া আনিয়া রসিক তাহাতে ঘা দিয়াছে কি দেয় নাই, জমিদারের দরোয়ান কোথা হইতে ছুটিয়া আসিয়া তাহার গালে সশব্দে একটা চড় কষাইয়া দিল; কুড়ুল কাড়িয়া লইয়া কহিল, শালা, একি তোর বাপের গাছ আছে যে কাটতে লেগেছিস?

রসিক গালে হাত বুলাইতে লাগিল, কাঙালী কাঁদ-কাঁদ হইয়া বলিল, বাঃ, এ যে আমার মায়ের হাতে পোঁতা গাছ, দরোয়ানজী! বাবাকে খামোকা তুমি মারলে কেন?

হিন্দুস্থানী দরোয়ান তাহাকেও একটা অশ্রাব্য গালি দিয়া মারিতে গেল, কিন্তু সে নাকি তাহার জননীর মৃতদেহ স্পর্শ করিয়া বসিয়াছিল, তাই অশৌচের ভয়ে তাহার গায়ে হাত দিল না। হাঁকাহাঁকিতে একটা

ভিড় জমিয়া উঠিল, কেহই অস্বীকার করিল না যে বিনা অনুমতিতে রসিকের গাছ কাটিতে যাওয়াটা ভাল হয় নাই। তাহারাই আবার দরোয়ানজীর হাতে-পায়ে পড়িতে লাগিল, তিনি অনুগ্রহ করিয়া যেন একটা হুকুম দেন। কারণ, অসুখের সময় যে-কেহ দেখিতে আসিয়াছে কাঙালীর মা তাহারই হাতে ধরিয়া তাহার শেষ অভিলাষ ব্যক্ত করিয়া গেছে।

দরোয়ান ভুলিবার পাত্র নহে, সে হাত মুখ নাড়িয়া জানাইল, এসকল চালাকি তাহার কাছে খাটিবে না।

জমিদার স্থানীয় লোক নহেন : গ্রামে তাঁহার একটা কাছারি আছে, গোমস্তা অধর রায় তাহার কর্তা। লোকগুলো যখন হিন্দুস্থানীটার কাছে ব্যর্থ অনুন্নয় বিনয় করিতে লাগিল কাঙালী উর্ধ্বশ্বাসে দৌড়িয়া একেবারে কাছারি বাড়িতে আসিয়া উপস্থিত হইল। সে লোকের মুখে মুখে শুনিয়াছিল পিয়াদারা ঘুষ লয়, তাহার নিশ্চয় বিশ্বাস হইল অতবড় অসংগত অত্যাচারের কথা যদি কর্তার গোপ্তে করিতে পারে ত ইহার প্রতিবিধান না হইয়াই পারে না। হায় রে অনভিজ্ঞ ! বাঙলাদেশের জমিদার ও তাহার কর্মচারীকে সে চিনিত না। সদ্যমাতৃহীন বালক শোকে ও উত্তেজনায় উদ্ভ্রান্ত হইয়া একেবারে উপরে উঠিয়া আসিয়া-ছিলেন বিস্মিত ও ত্রুদ্ধ হইয়া কহিলেন, কে রে ?

আমি কাঙালী। দরোয়ানজী আমার বাবাকে মেরেছে।

বেশ করেছে। হারামজাদা খাজনা দেয়নি বুঝি ?

কাঙালী কহিল, না বাবুমশায়, বাবা গাছ কাটতেছিল, আমার মা মেরেছে। বলিতে বলিতে সে কান্না আর চাপিতে পারিল না।

সকালবেলা এই কান্নাকাটিতে অধর অত্যন্ত বিরক্ত হইলেন। ছোড়াটা মড়া ছুইয়া আসিয়াছে, কি জানি এখানকার কিছু ছুইয়া ফেলিল নাকি ! ধমক দিয়া বলিলেন, মা মেরেছে ত যা নীচে নেবে দাড়া। ওরে কে আছিস রে এখানে একটু গোবরজল ছড়িয়ে দে। কি জাতের ছেলে তুই ?

কাঙালী সভয়ে প্রাক্ষণে নামিয়া দাঁড়াইয়া কহিল, আমরা ছলে ।

অধর কহিলেন, ছলে ! ছলের মড়ায় কাঠ কি হবে শুনি ?

কাঙালী বলিল, মা যে আমাকে আশ্রয় দিতে বলে গেছে । তুমি জিজ্ঞেস কর না বাবুমশায়, মা যে সবাইকে বলে গেছে সকলে শুনেছে যে ! মায়ের কথা বলিতে গিয়া তাহার অনুক্ষণের সমস্ত অনুরোধ উপরোধ মুহূর্তে স্মরণ হইয়া কণ্ঠ যেন তাহার কান্নায় ফাটিয়া পড়িতে গাহিল ।

অধর কহিলেন. মাকে পোড়াবি ত গাছের দাম পাঁচটা টাকা আন গে । পারবি ।

কাঙালী জানিত তাহা অসম্ভব । তাহার উত্তরীয় কিনিবার মূল্যস্বরূপ তাহার ভাত খাইবার পিতলের কাঁসিটি বিন্দির পিসী একটি টাকায় বাঁধা দিতে গিয়াছে । সে চোখে দেখিয়া আসিয়াছে সে ঘাড় নাড়িল, বলিল না ।

অধর মুখখানা অত্যন্ত বিকৃত করিয়া কহিলেন ,না ত, মাকে নিয়ে নদীর চড়ায় পুঁতে ফেলে গেলে যা । কার বাবার গাছে তোর বাপ কুড়ুল ঠেকাতে যায় পাজী হতভাগা নছার ।

কাঙালী বলিল, সে যে আমাদের উঠানের গাছ বাবুমশায় । সে যে আমার মায়ের হাতে পোতা গাছ ।

হাতে পোতা গাছ ! পাঁড়ে, ব্যাটাকে গলাধাক্কা দিয়ে বাব করে দে ত ।

পাঁড়ে আসিয়া গলাধাক্কা দিল এবং এমন কথা উচ্চারণ করিল যাহা কেবল জমিদারের কর্মচারীরাই পারে ।

কাঙালী পূলা ঝাড়িয়া উঠিয়া দাঁড়াইল, তার পরে ধীরে ধীরে বাহির হইয়া গেল । কেন সে যে মার খাইল, কি তার অপরাধ ছেলেটা ভাবিয়াই পাইল না । গোমস্তার নিবিকার চিত্তে দাগ পর্যন্ত পড়িল না । পড়িলে এ চাকরি, তাহার জুটিত না । কহিলেন, পরেশ দেখ ত হে এ ব্যাটার খাজনা বাকী পড়েছে কি না । থাকে ত জাল-টাল কিছু একটা

কেড়ে এনেযেন রেখে দেয়—হারামজাদা পালাতে পারে !

মুখ্যে বাড়িতে শ্রাদ্ধের দিন—মাঝে কেবল একটা দিন মাত্র বাকী। সমারোহের আয়োজন গৃহিণীর উপযুক্ত করিয়াই হইতেছে। বুদ্ধ ঠাকুরদাস নিজে তত্ত্বাবধান করিয়া ফিরিতেছিলেন, কাঙালী আসিয়া তাহার সম্মুখে দাঁড়াইল, কহিল, ঠাকুরদশাই আমার মা মরে গেছে।

তুই কে ? কি চাস তুই ?

আমি কাঙালী। মা বলে গেছে তোনাকে আগুন দিতে :

তা দি গে না।

কাছারির ব্যাপারটা ইতিমধ্যেই মুখে মুখে প্রচারিত হইয়া পড়িয়াছিল, একজন কহিল ও বোধ হয় একটা গাছ চায়। এই বলিয়া সে ঘটনাটা প্রকাশ করিয়া কহিল।

মুখ্যে বিস্মিত ও বিরক্ত হইয়া কহিলেন শোন আবদার। আমারই কত কাঠের দরকার,—কাল বাদে পরশু কাজ। যা যা এখানে কিছু হবে না—এখানে কিছু হবে না। এই বলিয়া অগ্ৰত প্রস্থান করিলেন।

ভট্টাচার্য মহাশয় অদূরে বাসিয়া ফর্দ করিতেছিলেন, তিনি বলিলেন, তোদের জেতে কে কবে আবার পোড়ায় রে ? যা মুখে একটু নুড়ো ছেলে দিয়ে নদীর চড়ায় মাটি দে গে।

মুখোপাধ্যায় মহাশয়ের বড়ছেলে ব্যস্তসমস্তভাবে এই পথে কোথায় যাইতেছিলেন। তিনি কান খাড়া করিয়া একটু শুনিয়া কহিলেন, দেখচেন ভট্টাচার্যমশায় সব ব্যাটারাই এখন বামুন-কায়েত হতে চায়। বলিয়া কাজের ঝাঁকে আর কোথায় চলিয়া গেলেন।

কাঙালী আর প্রার্থনা করিল না। এই ঘণ্টা ছয়েকের অভিজ্ঞতায় সংসারে সে যেন একেবারে বুড়া হইয়া গিয়াছিল। নিঃশব্দে ধীরে ধীরে তাহার মরা মায়ের কাছে গিয়া উপস্থিত হইল।

নদীর চরে গর্ত খুঁড়িয়া অভাগীকে শোয়ান হইল। রাখালের মা

কাঙালীর হাতে একটা খড়ের ঝাঁটি জ্বালিয়া দিয়া তাহারই হাত ধরিয়া
মায়ের মুখে স্পর্শ করাইয়া ফেলিয়া দিল । তার পরে সকলে মিলিয়া
দিল ।

সবাই সকল কাজে ব্যস্ত শুধু সেই পোড়া খড়ের ঝাঁটি হইতে যে
স্বল্প ধূয়াটুকু ঘুরিয়া ঘুরিয়া আকাশে উঠিতেছিল তাহারই প্রতি পলকহীন
চক্ষু পাতিয়া কাঙালী উর্ধ্বদৃষ্টে স্তব্ধ হইয়া চাহিয়া রহিল ।

—